

ሶቀማንቹ ጳውሎስ ለንክ ሶህኑተ ቆሮንቶስ መረሃ ኣጉስ

ጳውሎስ ቆሮንቶስ መረሃ ከተቦ ለንክ ሶህኑተ ከተበሞሁ ቆሮንቶሳን ሄኔ መገኑ አመዕኔ መን ጭምት ምናን ሄዕዮስ ሜጡ እሁ አበ ሂለ እኮ ወክቲንት እቅ። መት-መቱ አመዕናኑት ጳውሎስ አሌን መት-መቱ ሂለ ጠወ ጠወኡስ ጎሬ ጳውሎስ ሀራሩተ ከለቆተ አበ ሀሾ፤ ሁኩንን እኮ ወክት አቡ መንዲኑት ሞጮጨንቶስገ ኩለኖ።

ሶህኖስ ዎኔ ክፍላን ጳውሎስ ቆሮንቶሳን ዮ መገኑ አመዕኔ መን ጭምት ዲእ ምናን ዮስ ጠውተኔሃ ኩል አመዕናኖ ኣዜን ኬዕዮ ጠዊሃ ጠረኝ መሰለ ሚሃ ኣሴጎሬ ሂር ኩለኖ። ህከኔን ሜጡ አዕይ ኩ እስ ጠረኝ መሰሉ ቶበት ሀራዕረንቶተ አዕዮሳሃ እኮቤቺሃ ሞጮጨሞስ መንዲኑተ ኩለኖ። ህከኒች ኤተሮን ይሁዳን ሄኔ አመዕናኑተ ሀዕሎኖተ ኒያችስ ኬስ ኣቶተ ኩለኖ። መጨረሽ ፎሎጮን ጳዎሎስ አሳበ አሌን ኬዕዮ ክሲሃ መከላከያ ኣስኖ። ቆሮንቶሳን መገኑ አመዕንቶ መን ዲእ ሞኒ መት-መቱስ ገውስ ሀንቅ አሳበተ አት ጳዎሎስ ክዝብ ሶቀማንቹ ይት ከሰሳሲት እቅ።

መጻፉስ አፎሃ

ኣጉስ (1፡1-11)

ጳውሎስ ለንክ ቆሮንቶስ አመዕናኑተ (1፡12—7፡16)

ይሁዳን ሄኔ አመዕናኖተ ሀዕሌመስገ (8፡1—9፡15)

ጳውሎስ ሶቀምስ ደኻነቲሃስ ሆንጠህሾ ጠወ (10፡1—13፡10)

መጨረሻስ (13፡11-14)

¹ መገን ሰውቲን መሲህ ኢስ አሳቤቹ እኮም እን ጳውሎስ አመኔቤቲቹ ጠጭቶሴች፡

ቆሮንቶሳን ዮ መገን አመዕናኖ ጭምት ዲእ ምናችለከ ህትን ዊመ አካይያን ዮ አመዕናኖተ ጉዕሚንከ

² እንችኔ መገንቺ፡ ቀርቼሃኔ መሲህ ኢስ ኣስቱትለከ ወገሬቱ ክዕኔሃ እሁን።

ጳውሎስ መገኒሃ ሆንጠህሾ ገለት

3 ማርቶ እነ እኮሃ ጠረኝመተ ጉዕመንከ ኣሰኖ ህትን ቀርቼሃኔ መሲህ ኢሰ እነ መገኒሃ ገለቱ ኢሉሰ።

4 ነኡን መገኒች ኣእኖም ጠረኝማን ኦርሽ ኣዜን ዮእረ ጉዕመንከ ጠረኝሱ ኣታልኖተ መገኑ ኔሳሃ ኦርሻን ጉዕማንን ጠረኝሰኤ።

5 መሰንትሰ መሲህ ኦርሽተ በትኝሰ ቤቀሞምገን ጠረኝመታ መሲህ ኣዲን በትንሰ ደእኖም።

6 ህትን ነኡ ኦርሽተ ቶንጋሚሁ አዕኑ ጠረኝቶኖተለከ ጡምቶኖታት፤ ህትን ነኡ ጠረኝኖምጎሬ አዕኑሁ ነኡ ቶንጋም ደኒን ኦርሽተ ኣታዕሊን ቶጌን ጠረኝቴነንተ፤

7 ህከኒሃ ኒ ኦርሽተ ቤቀንቴነንተህንገን ሙንዲኡኔ ቤቀንቴነንተገ ደንጋምቤቺሃ ክዕኔ ኣሌን ዮኔ ተብሶሁ ጠረኝሃን።

8 አመኤ ኦሶ! እሰይ ባዶን ኢልቶኔ ኦርሽተ ደኅኖተ ህንሳም፤ ሁኩንን ኢልቶኔ ኦርሽተ ኣታዕልኖም ጌሲች በተኣን ፎሊን ሄዕኖም ተብሳሃ ሙርኖም እቅ።

9 ህትን ሬሁተ ፈረዳመአንገ አዕን ቀልቤኔ ሰውይኖም እቅ፤ እኮጎሬ ሁኩ ጉዕሙንኩ ጠዉ ኣሌኔ ኢሉኢሁ ሬቶ መነ ሬሆች ኬሰኖ መገኖን ድከዕንት ቤሉ ገይኔ ዎልቃን ድከዕንበጋት።

10 መገኑ ሬሆች ጡምሾኔ፤ ቲሁ ጡምሰኤ፤ ህትን ከ ኤተሩሃ ፌሰኤገ መገኖን ተብሳሃ አዕኖም።

11 አዕኑሁ ኔሳሃ ዱኣ አቴነን ሀዕሉ ሀሰሰኖህዕኔ፤ ህትን አበ ዱኣን ነኡ መገን ሀዕሊንሽ ደእኖም ወክት ልግቡ መኑ ኒ መሳን መገኑ ገለትጨኖ።

ጳውሎስ ዎቃ ሃመኖ ያደተ ዶሩስ

12 ነኡ ድከዕኖምርቹ ከኒት፤ ከን ዱንዮ ኣሌን በትሽን ክዕኔን ሜጡብ ዮኔ ደቀንሹ መገኒች ደዕኖም እመዕነንሺን ሄዕኖምገ ቀልቡኔ መስከረኖ፤ ሁኩንን መን ሀይማን እሁዕነ መገን ኣሰቶኒት።

13-14 መሰንትሰ አዕኑ እነበቢሃለከ ኣጥራመቲሃ ኣታልቴነንተህን ቤሉ ዎሉ መቼርቹሃ ከተባንክዕኔበኣ፤ ህኳን እኮቤቺሃ ቀርቹኔ ኢሰ እሜተኖ በር ነኡ ክዕኔን ድከዕኖተለከ አዕኑ ኒን ድክኦኖተ ከኒች ብርተ ኒተኔሃ ቀዉንከ ኣጥራመቲነንታሁ ኤተሮንገ ሹልቴን ኣጥራመቲነንተገ ተብሳሃ አዕኖም።

15 ከን ጠዋን ህንቀኝ እኮምቤቺሃ አዕኑ ኢን ለሙ ወክት ደግለሸቀንቶኖተ ይ ጉዕመርቹን ሄጭ ክዕኔቤቹ እሜቶተ ሀሾም።

16 አንን መቄዶን ባዱ መረንለክ ህክንቤቶች አሜተን ክዕኔቤቹ አሜቶተ ሰውይዮም እቅ፤ ህትን ክዕኔቤቶች ይሁድ ባዱ መራም ወክት ዋቄሃኤ ሽንቅተ ኣቴን ህርሲሴነንተኤገ ሰውይዮም እቅ።

17 ህትን አን ያጀም ወክት ሸኬምንዶ? ህትን አን ሰውያሚሁ መን ሰውትገ መቱርቹ «እሁን» ይ ፈንቀሽንገ «እሁንከ» የንትንዶ?

18 መገኑ ሀንቅንከ አመነሞኢሃ እኮገን ነኡሁ ኩልናንክዕኔ ላገት «እሁን» ይን «እሁንከ» ይኖታበኢ።

19 አን ሰላሰለክ * ጠማቶሰ ተማርሰኖህዕኔሁ መገን ቤቱ መሲህ ኢሰ ጉዕመ ወክት «ኤ ሀንቁንከ» መቶረ «እሁን» መቶረ «እሁንከ ዩሃበኢ።»

20 መገኑ ኣሴኔ ተብሶሁ ጉዕመንኩ «እሁን» እኮሁ መሲህት፤ ነኡ መሲህን መገን ኬዕምኚሃ «አሚዕን» ይናሚሁ ከኒሃት።

21 ኔሳሃ ክዕኔን ሜጡበ መሲህን ጠረኝናምገ አዕዮኔሁ መገኑሃን፤ ቡሮኔሁ እሶት።

22 እሰረ እሁኔ ለሊሰኖ ገይሰ ማተመ ኒ አሌን አዕዮሁለክ ጠሊሊ አያነሰ ሩብት እሆተ ቀልቤንከኔ አፋሼኢሁ እሶት።

23 አን ቆሮንቶስ ከተመ ፈንቀል አሜቱዕን ፈቆሚሁ ኡሙዕር ሻዝሳንክዕኔበእገ ይዪት፤ ሀከኒሃ መገኑ ምስክርሃኢ።

24 አዕኑ አመዕነቶንከክዕኔ ጠረኝቴን ኡርቴነንተረ እኬንተቤቺሃ አዕኑ ሙንደኦኖተ ክዕኔን ሜጡበ አዕናምሀን ቤሉ አመዕነትክዕኔ አሌን ቀርቻኑተ እንካምበኢ።

2

1 ቴሱ ሻዝሶህዕኔተ ሀሳምበእቤቺሃ ለንኪሃ ክዕኔቤቹ አሜታምበእገ ሙርሰጭዮም።

2 አን ክዕኔተ ሻዝሾንክዕኔጎሬ ሻዝሾንክዕኔ ክዕኔ ቤሉ ኤሳሃ ሙንዲሲሰኖ አይ ዮኤ?

3 አን ህት ከተቦንክዕኔሁ ክዕኔቤቹ አሜቶም ወክት ኤሳሃ ሙንዲሲሰኖ ሀሳ መኑ ሻዝበእገ ይዪት፤ መሰንትሰ ኢ ሙንዲኡት ጉዕሚክዕኔ ሙንዲኡት እሁሰ አመዕናም።

4 መሰንትሰ አን ልግቤ ኦርሻን፤ ቀልብ ጭንቃንለክ አበ እንጂጃን ከተቦንክዕኔ ክዕኔተ አበ ኢታንክዕኔገ ደጎኖታት ቤሉ ሻዝሶህዕኔታበኢ።

መን ቤሱ «ፈቁን» ይተኔሃ

5 መነ ሻዝሾ መንቹ አዲሁ ሄዕዮጎሬ ሻዥሾሁ ጠለዕል ኤሳሃ አሁዕነ ቤሱስ በትሱ እሁንከኤ ቤሉ ጉዕመንከኤ እህበረ ልግብንከኤ ሻዝሾኤ።

6 ህትኔ መንቹሃ ክዕኔች ልግቡኔ ቀጠኤንተስ ቅጣት ጌሱ እህኖስ።

7 ህካን እኮቤቹሃ ሁኩ መንቹ አበ ሻዥቤቹሃ ተብሳሃ ሙረኖበዕገ አዕኑ እሱሃ ማርንስ ዩለከ ጠረኝሱ ሀሰሰኖህዕኔ።

8 ህትን እሱን ዮህዕኔ ኢተተ ፈንቀሽቲን ጠረኝሶኖተ ኤጫንክዕኔ።

9 አንን ህካን ከተሶንክዕኔሁ ፈተነንቲን ጉዕመ ጠዋንን አዘዘንቲንተረ እሁክዕኔ ደጎተ ይዪት።

10 አዕኑ ማርንስ ይቲነንተስ መንቹ አዬሁ እኮጎሬ አኒሁ ማራንስ፤ ሁኩ መንቹ ቤሾርቹ ሄዕዮ ጎሬ አን መሲህ ብሬን «ማርም» ያንሲሁ ክዕኔተኔሃት።

11 አን ህካን አአሚሁ ሸይጣን ሂለ ጠወ ደንጋምቤቹሃ ኔሳሃ ጣንሰኖበአገ ይዪት።

ጢርአደ ዩኖቤቸን ጳውሎስ ጨነቀሙስ

12 ህከኒች ኤተሮን መሲህ ተሸት ላገተ ተማርሶተ ጥርአድ ከተመ መርም ወክት ቀርቶ ሆጎ ኡሩት ፈንተኦኤ እቅ።

13 እኮጎሬ አመኤ ቤቲን ቲቶን ደቀሙ ሆጎምቤቹሃ ቀልቡኤ ሻዥ እቅ፤ ህካን እኮቤቹሃ «ወገሬቲን ሄዕዬ» ይ እሳች አደ እክ መቄደን ባዱ ኦርዕዮም።

አንጂሉ ቄለኖሃን

14 ጠዉ እኮጎሬ መሲሂን ጉዕመ ወክት ድለ አዕናምረ አዕይ አዎንሰኖኔለከ ኤንኬዕንስ አንጀኖ ፎገል ኒ መሳን ጉዕመ ቤቸን ለሊሰኖ መገኒሃ ገለቱ እሁንስ።

15 መሰንትስ ጡምታህኡተለከ በኣህኡኤ በላን መገኒሃ መሲሂን ጡሙ ፎገሉ ዮስ አንጀነተ አንኮም።

16 ህካን እኮቤቹሃ ነኡ በአኖ መኒሃ ሬሆተ አንጀነ፤ እኮጎሬ ፈቀኖ መኒሃ ሄዕተ አንጀነ፤ ህከን ጠዋሃ በቀአኖ መንቹ አዬት?

17 መሰንትስ ነኡ መገን ላገተ ነገዳ ልግቤ መንጋበኣ፤ ጠዉ እኮጎሬ ነኡ መገኒች ሶህሞ መንገ መሲህ አዲን መገን ብሬን አመዕነምምረ እንክ ጠወዕናም።

3

ሃዕሮ ወአድ ካዲመተኔሃ

1 ገወኔ ፈንቀሽን ገለትጭናምትንደ? ህከረንገ መት-መቱ መኑ አታሀንገን ክዕኔሃ ህከረንገ ክዕኔች ገይኔ ጡምመተ ለሊሳ ደብዳቤተ ሀሰሳኔንደ?

2 አዕኑ መኑ ጉዕመንኩ ደገኖህዕኔሁለክ አነበበኖህዕኔሁ ቀልብኔ አዜን ከተበንቱንተ ደብዳቤተኔ።

3 አዕኑ ኒ ክድማን አሜቱንታሁ መሲህ ሶህኑተ እሁክዕኔ ለሊዮእሃን፤ ኩ ሶህኑት ከተበንቶአሁ ሄአኖ መገን እያነንት ቤሉ ቀለማንበአ፤ ህትን ከተበሞንኩ መን ቀልቤን ቤሉ ክኒ አሌንበአ።

4 ካን ይናም መሰንት መሲህ መሳን መገን አሌን አመዕነቱ ዮኔቤቺሃት።

5 ክድመ ሆጉተ አዕኖተ አታልናሚሁ ዋልቀተ አሰኖኔ መገኒንት ቤሉ ነኡ ጠረኛኑተ እንክበአ።

6 ሃዕሮ ወአድ ላገ ካዲመተ እንኮተ ዋልቀተ አሴኔሁ እሶት፤ ሁኩንን ከተቤመ ሕጊን እሁዕን መገን እያን ወልቃኒት፤ ከተቤመ ሕጉ ሬሁተ ኤበኖ፤ መገን እያኑ እኮጎሬ ሄኡ አሰኖ።

7 ክኒ አሌን ከተበሞ ሕጉ አሜቸሁ ኬዕምኚንት፤ ሁኩን መሰሚኔ አሌን ለሊን ሄዕዮ ኬዕምኙ ሆፈኒን ኦሮዕዮ ጎሬሁ ሚንሰ አበ በለቃኢሃ እኮቤቺሃ እሰራኤላውያኑት ሚንሰ ቱክ ይት ለኦተ አታልቶበአ፤ ቱሱ ኩን ሬሆቤቹ አዋንሰኖ ሕጉ ህትኔ ሎረ ኬዕምኚን አሜቸሃ እኮች

8 ጠሊሊ መገን እያን መሳን ደገመኖ ክድመት በተአኖ ኬዕምኙ ሄአኖሰበአንደ?

9 መሰንትሰ መን አሌን ፍርደ ኤቦ ሆጎተ ኬንኩ ኬዕምኙ ሄዕዮች መኒ ፈይመተ ኤቦ ሆጎተ በተአኖ ኬዕምኙ ህት ሄአኖሰበአ?

10 ወዕና ሄዕዮ ኬዕምኙ ኤተሮን አሜቸ ኬዕምኚን ሚጡበ ለኤኖ ወክት መቱርቺሁ ኬዕምኙ ዮሰበአሃ እሁሰ ለዕናም።

11 ሁኩ በአን ኦሮአን ሄዕዮሁ ኬንኩ ኬዕምኙ ሄዕዮሲች ዘላለሚሃ ጠረኝ ሄአኖሁ ህት በተዕዮ ኬዕምኙ ሄአኖሰበአ።

12 ቱሱ ህትኔ ተብሶሁ ሄዕዮኔች ነኡ መለልን ጠወዕናም።

13 እሰራኤላውያኑት ሚኔሰ ኑሩ በአን ኦሮአኖሃ መጨረሽሰ ለአበአገ ሚንሰ ሻሺን ድቦ መሰጋበአ።

14 እሰ ቀልቡ ዱጆኡ፤ ከበሬ ኢሊ ኑባቹ ወኣድ መጻፈ አነበቤኖረ ቀልቡሰ ህከን ሻሺን እፍሰሞጋንት፤ መሰንትሰ ሁኩ እፍሰሞሁ ኬአኖሁ ጠለዕል መሲሂን እኮቤቺሃት።

15 ኤ ከበሬ ኢሊ ሕግ መጻፈተ አነበበንታ ወክት ጉዕመንከ ሁኩ ሻሹ ቀልቤንከሰ ሄአኖ።

16 ጠዉ እኮኅሬ መኑ ቀርቾ ኢሲበ ፈንቀሎ ወክት ሁኩ ሻሹ ሸቀኖ።

17 ህትን ቀርቹ እያን እኮቤቺሃ ቀርቹ እያኑ ዮቤቾን ጉዕማንን ሰዎልድመት ዮኡ።

18 ነኡ ጉዕሙንኩኔ ጌረደሞበእ ሚኔን እንክ ለአቃንቺን ለእናምሀንገ ቀርቹ ኬዕምኝ ለዕናም፤ ነኡ ኬዕምኝቺ ኬዕምኝን እሱ አኑዲሃ ዶረማሚት፤ ሁኩን እኮሁ እያን እኮ ቀርቺቶት።

4

ሀንቅ ክድመተ

1 መገን ማርቶን ኩ ሆጉት ዮኔቤቺሃ ተብሳሃ ሙርናምበእ።

2 ጠዉ እኮኅሬ ማጠሞለክ ሙልሲሰኖ ጠዉ ኡጅኖም፤ ተንኩተ አዕናምበእ፤ መገን ላገተ ክዝቢን ልቀለንቃምበእ፤ ህከን ወጢ ሀንቅ በነቻን ለሊንሳም፤ ሀንቅ ለልሲን እኮኅሬ መገን ብሬን ጡመ አዕናሚሃ እሁኔ መኒሃ ጉዕሚንከ ለሊንሳም።

3 ነኡ ተማርሰኖም እንጂል ላገት አይደጎ ማጠሞሃ እኮኅሬ ማጠሞሁ በእኖሁ መኒሃት።

4 ህትን መገን ሞሳልተ እኮ መሲህ ሎርመተኔሃ ኩለሞ ተሸት እንጂል ላገ ኑር ለአበእገ ከን ኣዱንያ አል ሸይጣኑ መገኑ አመዕንቶብእ መን ቀልብ ቆቅሾኡ።

5 ነኡን መሲህ ኢሰ ቀርቹ እሁሰለክ ነኡ ገዉኔ ኢሰተኔሃ ክዕኔ ካዲመተ እንኮም ቤሉ ገይኔተኔሃ ተማርሰናምበእ።

6 መሰንትሰ «ቱንሰች ኣዚች ኑሩ ፋሉን» ይ ጠወዕዮ መገኑ መሲህ ብሬን ለሊሰኖ መገን ኬዕምኙ ደንጋም ኑር ኣሶኔተ ኑሩሰ ቀልብኔ ኣዜን ለሊሰኖገ አዕዮ።

7 ጠዉ እኮኅሬ ኩ ሎሩ ዎልቀት መገኒሃ እሁንሰ ቤሉ ኒሃ እሁ ሆጉሰ ለልሲሃ ኩ ሎሩ ጠዉ ትብ ኑዳገ እንኮም ኒ ኣዜን ዮኡ።

8 ኔሳሃ ጉዕመ አዲንን ኑርሸት አልታኔ፤ ጠዉ እኮኅሬ ቁለማምበእ፤ ልግብ ወክት ጉረተ ኣገኖኔ ቤሉ ተብሳሃ ሙርናምበእ።

9 ህትን ሸሬኖኔ ቤሉ ሜጢሃኔ እንክ ፈንቃምበእ፤ ዎቀረም አንባም፤ እኮኅሬ ሬናምበእ።

10 ኢሰ ሄኡ አሌኔ ለሎተ ጉዕመ ወክት ጅሰምኔ አሌን ኢሰ ሬሁተ እጅን ዘህናም።

11 መሰንትሰ ኢሰ ሄኡ ሬሀኖ ጅሰማንከኔ ለሎተ ኔሳሃ ቱሱ ፎሊን ዮምረ ኢሰተኔሃ ጉዕመ ወክት ሬሆተ ህግሴን ኣሴኖኔ።

12 ህዓን እኮቤቺሃ ሬሁት ኒ አሌን ሆጉተ አታኦ። እኮጎሬ ሄኡክዕኔ አሌን ሆጉተ አኣኖት።

13 እሁን ቤሉ «አመዕንዮም፤ ህዓን እኮቤቺሃ ጠወዕዮም» የመም ከተበሞቤቺሃ ሁኩ አመዕነት ቀልቡ ዮኔቤቺሃ ነኡ አመዕንናም፤ ህዓን እኮቤቺሃ ጠወዕናም።

14 ቀርቼ ኢሰ ሬሆች ኬሾ መገኑ ኔሳሃ ኢሲን ሜጡበ ኬስኖኔገለክ ክዕኔንን ሜጡበ እሰ ብርተ ሆንጠህሰኖኔገ ደንጋም።

15 ሁኩን ጉዕሙንኩ እኮሁ ክዕኔተ ደግለልሃት። ኣሰቱት ልግቤ መኒሃ ኢልቶኢሁ መገኒሃ ኬዕምኝ እሆኖ ገለቱ በተኦታት።

አመዕነቲን ሄኡ

16 አብልን ለኤኖ ጅሰሙኔ በአን መሮ ጎሬ ኣዘኔ ጅሰሙ በሬን በሬን ሃዕርሃ እኮቤቺሃ ተብሳሃ ሙርናምበኦ።

17 ከን ቀዋ ወክቲሃ ኦርጨማም ኬዕምትበ ወክትሰ ኦርሸት ሎረለክ ዘላለሚሃ ሄኡኖ ኬዕምኚሃ ቅጥ አታኔት።

18 መሰንትሰ ነኡ ኦሎንሰን ዮሚሁ ለልባሃት ቤሉ ለለኖሃበኦ፤ ለለኖርቹ ቀወ ወክቲሃት፤ እኮጎሬ ለልበርቹ ዘላለሚሃ ሄኡኖሃን።

5

1 ኩ ዱካንገ ዮ ኣዱንያ አል ሞኑኔ ድጀሞች መን እንጋን እሁዕነ መገኑ እጃሮ ዘላለሚሃ ሄኡኖ ሞኑ ሰማን ዮኔሃ እሁሰ ደንጋም።

2 ሀንቅንከ ነኡ ሰሜ ሞኒኔ ኦደዕኖተ አበ አዛንባሚት።

3 መሰንትሰ ህዓን ኦደዕኖሚች ኤተሮን ከልን እንካምበኦ።

4 ህትን ከን ዱካኖን ዮም ጌሳን ኬዕሜሃኔ አዛንባሚት፤ ነኡ ኦርጨቀማሚሁ ሬሆኖ ማሉኔ ሄኡን ዶረሞተ ሰማን ዮ ሞኒኔ ኣንጎተ ሀንሲት ቤሉ ከን ኣዱንያ አል ጠዊች አደ እሂሃ ሀንሰበኦ።

5 ከን ጠዊሃ ቅጥ አዕዮኔሁለክ ጠሊለ ኣያን ኔሳሃ ሩብት እሆተ ኣሴኔሁ መገኑሃን።

6 ነኡ ማለን ከን ኣዱንያ አሌን ዮም ጌሳን ቀርቹን ሜጡበ ሄኡ ሆጉኔ ደንጎምጎሬ ጉዕመ ወክት እሱ አመዕንን ሄዕናም።

7 መሰንትሰ ነኡ ሄዕናሚሁ አመዕኒንት ቤሉ ለእንበኦ።

8 ህትን ከን ማሊች አደ እንክ ቀርቾሃ ኢሲን ሜጡበ ሄዕኖተ ሄዕላንታሞቤቺሃ አመዕነንሺን ሄዕናም።

9 ህዓን እኮቤቺሃ ማለንከኔ ሄዕኖም ጎሬ ህከረንገ ማሊችኔ አደ እንኮምጎሬ ሰውቱኔ መገኑ ሙንዲሲሱሃን።

10 መስንትሰ መት-መቲሰ ማሊንከሰ አዕዮ ጡመ ጠዋሃ እኮ ሂለ ጠዋሃ ሆነሰ ዋገ ሀሰሰኖሰርቹ ቶጊሃ ጉዕሙንኩኔ መሲህ ፍርድ ቦርጭመ ብርተ ሆንጠሁ ሀሰሰኖኔ።

11 ቀርቹ ዋጂ ዩ መዩሃ ጎሬ ደንጋምቤቹሃ መኑሁ ደገኖገ አዕናም፤ እኮጎሬ ነኡ ሀትናሞሃ መነ ጎሬ መገኑ ደገኖ፤ ክዕኔ ቀልቡሁ ህካን ደገኖሃ እሁሰ ተብሳሃ አዕናም።

12 ቀልብ ኣዜን ዮ ጠዋን እሁዕነ ለለኖ ጠዋን ድከኣ መኒሃ ፈንቀሽቲነንተ መሰሉ ሄኦህዕኔተ ኒን ድከኤነንተ ዋቃሃ ደእቲነንተገ አዕኖህዕኔታት ቤሉ ቲሱ ገዉኔ ክዕኔ ብሬን ገለትጭኖታበኣ።

13 ነኡ በርገጋሽ እንኮምጎሬሁ መገኒሃ ይኒት፤ ህትን ኤንኬዕናመተ እንኮምጎሬ ክዕኔኤሃ ይኒት።

14 መቱ ወክት መሲህ መኒሃ ጉዕሚንከ ሬሁሰለከ መኑ ጉዕሙንኩ እሰ ሬሆተ ቤቃማኑተ እሁሰ ደንጎምቤቹሃ መሲህ ኢተቲ ሆጎተ ግዳጅሳኔ።

15 ህትን ፎሊን ዮ መኑ ጉዕሙንኩ እሳሃ ይ ሬዮለከ ሬሆች ኬዕዮ መሲህሃ ሄኦታት ቤሉ ከ ኤተሩ ገይህሰ ይት ሄኦበኣገ መሲህ ጉዕሚንከ ሬዮ።

16 ቲሱ ከ ኤተሩ አዬሁ መኑ ለአኖ ሃሊን ለዕናምበኣ፤ ነኡ መሲህ ከኒች ብርተ ህት ለአኖም ጎሬ ከኒች ኤተርን እኮጎሬ ህት ለዕናምበኣ።

17 ህካን እኮቤቹሃ አዪሁ መሲሂን እኮጎሬ ሃዕርሃ ክልቀት፤ ኑባቹ ክልቀቱ ሀጎኡ፤ እሲንን ሃዕር ክልቀቱ አሜችኡ።

18 ሁኩ ጉዕሙንኩ ጠዉ እኮሁ ኔሳሃ ገይንከሰ መሲህ አዲን ሀራርሴኔለከ ሀራር ሆጉተ ኣሴኔ መገኒችት።

19 መገኑንኩ መን ጨብ ዋለኡዕነ መሲህ አዲን ከን ኣዲንያ አል መነ ገይንከሰ ሀራርሴ ዩሃን፤ መነ ቀርቹን ሀራርሰ ላገተ ኔሳሃ ኣሴኔ።

20 መገኑ ኒ አዲን መነ ገአኖቤቹሃ ነኡ መሲህሃ ወከለሞምራን፤ ህካን እኮቤቹሃ ነኡን «መገኒን ሀራዕረሜ» ይን መሲህ ሱዕሚን ኡጭናንክዕኔ።

21 ነኡ መሲህ አዲን መገኒሃ ፈዩ እንክ ዋለአሞተ ጨቡ ዮበኣ መሲሂ መገኑ ኒተኔሃ ጨበኣገ አዕይ ዋለዕዮሰ።

6

1 ነኡ መገኒን ሜጡብ አዕናምረ እንኮምቤቹሃ መገኒች ቶጊንተ ኣሰቱተ ተሰ ኦቲነንተበኣገ ኡጭናንክዕኔ።

2 መስንትሰ መገኑ
«እን ኢታም ወክቲን ሞጮጤንሰ!

ጡም በርንከ ሀዕሌንኬ» የኖቤቹሃ
«እስ አተኖ ወክቱ ቴሶት፤ ጡሜኖ በሩ ቴሶት።»

3 ኒ ሆጉት ህንቀንታበእገ ይን መ ጠዋን አይሁ ጉፋቹ እንካምበአ።

4 እሁን ቤሉ አዕናም ጠዋን ጉዕማንን ገውኔ መገን ካዲመገ ሆንጠህንሳም፤ ሁኩንን አበ ኦርሻን፤ ሻዞን፤ ጭንቃን፤

5 ገረፈሚን፤ ኡሱረሚን፤ ረብሻን፤ ሆኅ በትኘን፤ ግሰኛተ ሆጊንለክ ጎሪንት።

6 ህትን ነጢማን፤ ኤንኬዕሊን፤ አደቢን፤ ጎደበ ላፍማን፤ ጠሊሊ አያሊን፤ ሀንቀ ኢታን፤

7 ሀንቀ ጠወ ጠወኢንለክ መገን ዋልቃን ሄዕናም፤ ፈይመ በገዝ ኦዳተ ጉረለክ መኬ አንጋን አፊኒት።

8 ኬዕምኚንለክ ሆፍኚን፤ ገለትጨሚንለክ ቦርረሚን ሄዕናም፤ ሀንቀኛኑተ እንከን ክዝበኛኖግ ዋለአምም፤

9 ደገማምረ እንከን ደገምበረ እንኮም፤ ሬቶ ዬነን ፎሊን ዮምረ እንክ ደገማም፤ ኦሌመኔጎሪሁ ሬኖምበአ፤

10 ሻዙት ኢልቶኔጎሪ ጉዕመ ወክትንከ ሙንደዕናም፤ ቡጥቻኑተ እንኮምጎሪሁ ልግብ መን ቀባጣመተ አዕናም፤ መቱርቹሁ ዮኔበእረ እንኮምጎሪሁ ጉዕሙርቹንኩ ኒሃን።

11 ቆሮንቶስ ከተማን ዮንተ መኑ! ነኡ መቱርቹሃ ፊንሱዕነ ኩልኖንክዕኔ፤ ቀልብኔ አልባሽን ፈኖንክዕኔ።

12 አዕኑ ኢተክዕኔ ኔሳሃ ከንቴንታኔ ቤሉ ነኡ ኢተኔ ክዕኔሃ ከምምበአ።

13 ጠዉ እኮጎሪ አዕኑ እለኤ እኬንተቤቹሃ ያንክዕኔ፤ ነኡ ቀልብኔ ጠወ ማንጠዕነ ኩልኖንክዕኔገን አዕኑሁ ቀልብክዕኔ ጠወ ማጦኑዕነ ኩሌኔ።

አመዕንበ መኒን ሜጡ እሁ ገበእባሃ እሁስ

14 አመዕንበ መኒን ገበእበ ዎቄን ጠመደንቶኖቹ፤ መሰንትሰ ፈይመትለክ ጨቡ ህት እክ ደቀንቶተ አታልታክ? ህትን ኑሩለክ ቱንሰቹ ህት እክ ሜጡበ ሄኑተ አታልታክ?

15 ህትን መሰሂሃለክ እልብሲሃ * ም ደቀንሹ ዮስ? ህትን አመዕኔኢሁለክ አመዕንቡሁ ሚን ደቀንታክ?

16 መገን ምኑ ሸርኬን ም ደቀንሹ ዮኡ? መሰንትሰ መገኑ
«እን እሳን ሜጡብ ሄአም፤

6:2 እሳ. 49፥8። 6:5 ሶቀ. 16፥23። * 6:15 እልብሱ፡- ግሪክ አፎን «ቤልያል» ህከረንገ «ቤልያር» ዕብራይስጥ አፎን «ቤልዐል» ዬኖስ። ፍሳረንትሰ «ክልበ እኮሃ» ህከረንገ «ሕጉ ዮስበኢሃ» ዩ እህን ሻይጣኒሃ ኣሰምሰዩ ሱዕመ።

በላንከስ ፈንቀላማም፤
 መገኑሰን እሃም፤
 እሰን ኡመቲኤ እካእ»
 ይ ጠወዕዮገን ነኡ ጉዕመንከ አታለኖ መገንያ ምኒ።
 17 ህካን እኮቤቺሃ ቀርቼ
 «እሰ ኣዚች ፋልቲን አደ እኬ፤
 ንጃሾሃ መርቼሃ ኡልቶኖቼ፤
 አንን ኢረ አዕይ ቶጋንክዕኔ፤
 18 ህትን አን አነክዕኔ እሃም፤
 አዕኑ ኤሳሃ ጎነለከ ሜኣ አለተ እኬነንተ
 የኖ ጉዕመንከ አታለኖ ቀርቼ» ይእ።

7

1 ቲሱ ኢ ጃላ! ኩ ጉዕሙንኩ ተብሶሁ ኣሰሞሁ ኔሳሃ እኮቤቺሃ
 ማለለከ አያነ ንጃሰሰኖ ሀከን ጠዊቶ ገዉኔ አገዕርኖ፤ መገኑ ዋጂን
 ዊመ ዊሚን ጠሊልማን ሄዕኖ።

ጸውሎሴ ሙንዲኑተ

2 ቀልቢን ቶጌኔ፤ ነኡ ሜጡ መንቼሃ በደልኖምበእ፤ መቱ መንቼሃ
 ምርኖምበእ፤ መቱ መንቼሃ ደግለሽቀማምሃ አዕኖምበእ።

3 ካን ይናሚሁ ክዕኔ አሌን ፈረንዶታበእ። ከኒች ብርተ
 ኩሎንክዕኔገን አዕኑ ቀልብኔ ኣዜኒት፤ ህካን እኮቤቺሃ ሄኦን እኮ
 ሬሆን ጉዕመ ወክት ክዕኔች መለዕለማምበእ።

4 ክዕኔ አሌን የኤ አመዕነቱ አበሃን፤ ክዕኔን አበ ቦናም፤ ክዕኔን
 ጠረኝመተ ደኣም፤ ኦርሻንተኔ ጉዕማኒን ሙንዲኑኔ ዳንጉ የሰበእ።

5 ነኡ መቅደን ባዲ አሜንቶም ወክት ጉዕመ አዲን ኦርሸት
 አሌንከኔ እልቶኔ ቤሉ ጅሰሙኔ ፎሎጭዮበእ፤ አብሊን ብተተ ሄኦ
 እቅ፤ ኣዚን ዋጂ ሄዕዮኔ እቅ።

6 ጠው እኮጎሬ ሻኩ መነ ጠረኝሰኖ መገኑ ቲቶ አሜቲን
 ጠረኝመተ ኣሴኔ።

7 ጠረኝኖሚሁ ትቶ አሜቲን ጠለዕል እሁዕነ አዕኑ እሱ
 ጠረኝሴንተገ ሞጮጮኒት፤ ህትን አዕኑ ኤሳሃ ለኦኖተ ሱንቲንተገ፤
 ኤሳሃ ጨነቀንቲንተገለከ እኮ ጠዋን ሰጩሰ ሞጮጮኖም ወክት
 አበ ተሽ ይኤ።

6:16 ለዋ 26፥12፤ ሕዝ. 37፥27፤ 1 ቆሮ. 3፥16፤ 6፥19። 6:17 ኢሳ. 52፥11።

6:18 2 ሳሙ. 7፥14፤ 1 ዱዱ. 17፥13፤ ኢሳ. 43፥6፤ ኤር. 31፥9። 7:5 2 ቆሮ.
 2፥13።

8 ከኒች ብርተ ከተሮንክዕኔ ደብዳቤት ሻዝሳህዕኔጎሬ ሚሃ ከተሮም ይ ሰጫምበእ፤ ሰጪም ጎሬ ሰጪም ሶህኖንከኤ ቀዋ ወክቲሃ ሻዝሶህዕኔቤቺሃት።

9 ቴሱ እኮጎሬ ተሽ ይዮኤ፤ መሰንትሰ ኤሳሃ ተሽ ዩኤሁ ክዕኔተ ሻዝሾንክዕኔቤቺሃ እሁዕነ ሻዘነክዕኔ መሳን ቶበቲን ፈንቀልቲንተቤቺሃት፤ ቴሁ ሻዘነክዕኔ መገኑ ዬገ እኮቤቺሃ ነኡ መቱርቺሃ በደልኖንክዕኔበእ ዩሃን።

10 መገን አዲን እኮ ሻዘነት ጡም አደ አዎንሰኖ ቶበቲን ደገመኖ ደረንሸ ደግሲሰኖቤቺሃ ሰጫቱንት ዮሰበእ፤ እኮጎሬ አዲንያ አል ሻዘነት ሬሁተ ኤሳኦ።

11 ኩ መገን አዲን እኮ ሻዘነት ሀትኔ ጠረኝመተ፥ ሀትኔ መሰለ ኣሱ፥ ሀትኔ ጡመ ኡመዕርተ፥ ሀትኔ ከበጅ ዋጁ፥ ሀትኔ ሱኑ፥ ሀትኔ ጡመ ሃሸኡ፥ ሀትኔ ሀንቅ ፍርዱ እሀን ለኤኖ ሄዕላቸተ ደግሲሾህዕኔገ ጡመገ ቀልቢን ለዕዬ። አዕኑ ከን ጠዋን ነጣኑተ እሁክዕኔ ጉዕመ አዲንን መሰከርሲሴንታኦ።

12 አን ከተሮንክዕኔሁ ኔሳሃ ዮህዕኔሁ ጡሙ ሰዉቱ መገንሀኔን ክዕኔሃ ጡመገ ለሉን ይዪት ቤሉ ቤሾ መንቸተኔሃ ህከረንገ ምዕርተዕዮ መንቸተኔሃበእ።

13 ህካን እኮቤቺሃት ነኡ ጠረኝመተ ደእኖሚሁ ህከን መሳኒት፤ ኒ ጠረኝማች አበ አዕኑ ጉዕመንኩክዕኔ ቲቶ ቀልብ ፎሎሰሴንን ቲቱ ሙንደዕዮቤቺሃ ነኡ አበ ሙንደዕኖም።

14 አን ክዕኔን ድከኣምገ ቲቶሃ ኩሎም እቅ፤ አዕኑሁ ሙልሴንታኤበእ፤ ነኡ ጉዕመንከ ወክት ሀንቅ ኩልኖንክዕኔ፤ ህከንገን ክዕኔን ድከዕናምገ ቲቶሃ ኩልኖም ሀንቅ እሁሰ ተሬገጠሞኡ።

15 ህካን እኮቤቺሃ ቲቶ ዋጅቲንገለከ ሁጤንን ጉዕመንኩክዕኔ አዘዘንቲን ቶጌንተሰገ ሰዉ ዮኖ ወክት ክዕኔሃ ዮሰ ኢተት አበሃን።

16 አን ክዕኔን አመዕነሙ አታሎምቤቺሃ አበ ተሽ ይዮኤ።

8

ኦርጨንቶ አመዕናኖተ ኣሴመ ሀዕላቀንሸ

1 አመኤ ኦሶ! መገኑ መቄዶን ባዶን ዮ መገን መኒሃ ኣሴ ኣሰቶተኔሃ ደጎኖተ ሀንሳም።

2 እሰ አሌንን አቡ ኦርሸት እካን ፌተነንቶኡ፤ እሁን ቤሉ ሙንዲኑሰ አበ እኮቤቺሃ እሰ መሃ ቡጥቻኑተ እኮጎሬ ሙንዲኖን አበርቺ አቶኡ።

3 እስን አታልቶ ጌሰ እሁዕነ አታልታህኒች አበ ኢትት ኣቶ ኣሰቶገ መስከራም።

4 ቲሁ እሰ «መገን መኒሃ ሀዕለኖ ብረ ነኡ ጭም አዕናም» ይት ጠረኝሰ ኡጭቶኔ።

5 ህትን እሰ ነኡ አገርኖምህኒች አበሃት ኣቶኢሁ፤ ወዕናሃ ገውሰ ቀርቹሃኔ መሲህ ኢሲሃ ህግሰ ኣቶኡ፤ ህከኒች ኤተሮን መገን ሰውትገ ገውሰ ኔሳሃ ህግሰ ኣቶኡ።

6 ከ ሆጉት ወዕናንከ ጀመርሁ ቲቶ እኮቤቹሃ ቲሁ እሰ ገውንኩሰን ህከ ጡመ ሆጉት ሹል አኣተ ኡጭኖንሰ።

7 አዕኑ ጉዕመርቾንን እሰን አመዕነቲኒ፥ ጠወኤነንተ ጠዊኒ፥ ኤንኬዕነን፥ ጡመ ሆጎን ጠረኝን፥ ኒን ዮህኔ ኢታን በተኤን ደገነቲንተገን ከን መኒሃ አኤኖ ጡመ ሆጎን በተዕዬ።

8 እን ህት ያንክዕኔሁ ክዕኔተ አዘዞታበአ፤ ጠወ እኮጎሬ ዎሉሰ ሀዕልቶተ አበ አጸንታቤቹሃ ክዕኔ ኢተተ ሀንቅ እሁሰ አጥራመቶተ ይደቶ።

9 አዕኑ ቀርቹሃኔ መሲህ ኢሰ ኣሰቱተ ደጌነንተ፤ እሰ መሃ ቀባጣው እኮጎሬ እሰ ቡጥማን አዕኑ ቀባጣመተ እኮኖተ ክዕኔተኔሃ ቡጥቹ ኢኮኡ።

10 ከን ጠዊተኔሃ ደግለለኖህዕኔ ጠወ ሸዛንክዕኔ፤ ኑሬ ዘማንች ጀመርቲን ጠለዕል ኢሲሃ እሁዕናን ከ ጠወ አቶኖተ ሰዉ ይቴነንተሩ ብሬሩ አዕኖት እቅ።

11 ህካን እኮች ዮህዕኔ ጌሲች ኣቶኖተ ሰው ይቴነተ ሰዊቱክዕኔ ዊሞተ ቲሁ ህከ ሆጉት ሹልቲን አዕዬ።

12 መቱ መንቹ ዮሰበእ ጌሰን እሁዕነ ዮሰ ጌሰን ኢት ኣሰኖሃ እኮች ህከን ኣሴርቾን መገኑ ሙንደአኖ።

13 እን ካን ያሚሁ ጉዕሙንኩክዕኔ ቅጡ እኮኖታት ቤሉ አዕኑ ኣቴነን ኦርጨቀንቲነን ዎሉሰንገ ፎሎጭቲን ይዮምበአ።

14 አዕኑ ኦርጨቀንቲነንተ ወክት እሰ ዱንያት ክዕኔ ኦርሸተ ሀዕልቶተ ቲሉ ክዕኔሃ ዮህዕኔርቹ እሰ ኦርሻተ ሀዕሉን፤ ከን ሃሌን በላንከክዕኔ ሜጦመት ሂኣኣ።

15 ሁኩንን፡- «ልግብ ጭምአዕዮህኒህ ተረፎሰበአ፤ ቀዉ ጭም አዕዮህኒሃ ሆፈዕዮሰበአ» የመም ከተበሞጋት።

ቲቶልከ ጃለሰ

16 እን ክዕኔሃ ሰውያም ጌሰ ቲቱ ክዕኔኤሃ ቀልቢንከሰ ሰውዮተ አዕዮ መገኑ ገለትጨሙን።

17 ቲቱ ክዕኔቤቹ አሜተኖሁ ገውሰ ሃሸዕይ ሙንዲኖን ኬዕይት ቤሉ ነኡ ጠለዕል ኡጭኖሰቤቹሃበአ።

18 ህትን እንጂሊ ተማርሰን አመዕናኖቤቸን ገለትጨዋ አመዕናንቹ እሲን ሜጡበ ሶንካም።

19 ህከኒቶ አበ ሀዕላቀንሸሰ ቶንጋም ወክት ሜጡበ መርተ አመዕናኖን መጠረሞኡ፤ ሀዕላቀንሸሰ ቶንጋሚሁ ቀርቹ ገውሰ ኬዕምሰኖሃለከ ዎሉሰ ሀዕሊሃ ዮኔ ጡመ ሃሸኢቶ ኬዕዮሀኒንት።

20 ከን መኒሃ ኢልንሶተ ኣሰሞኔ ብርተኔሃ አዪሁ ዎቀሰኖኔበእገ አገዕርናም።

21 አላመኔ ቀርቶ ብሬን ጠለዕል እሁዕነ መን ብሬንን ጡመ እኮ ጠወ አኡሃን።

22 ልግብ ወክት ነኡ አበ ወቄን ፌተነም ጠረኝ እክ ደገሞ አመኔቤቱ ቲቶንን ሜጡበ ሶንኮሚሁ ህከን መሳኒት፤ እሰ ክዕኔ አሌን ዮሰ አመዕነቱ አበ እኮቤቹሃ ከን ሆጎን ሀዕሎተ ዮሰ ጠረኝመት መ ወክቲቶ አበሃን።

23 ቲቶተኔሃ ደገሃ ሀሴንተ ጎሬ ክዕኔተ ሀዕሎተ ኢን ሜጡበ አኣኑሃ ጃላኤ፤ እሲን ሜጡበ አሜታሀኡተ ዎሎ አመኔ ኦሶተ እኮጎሬ እሰ አመዕናኖ ጭምት ወከለንቶረላከ መሲህ ኬዕምኚሃ ኡርቶእረ።

24 ህካን እኮቤቹሃ ኢተክዕኔ ለሊሼሰ፤ ከን ሃሊን ኢተክላከ ክዕኔ አሊን ህትን ድከኡ ተሰ አሁ ሆኑሰ አመዕናኖተ ጉዕሚንከ ለሊሴነንተ።

9

አመዕናኖተ ሀዕሊሃ ጭም አኤመ ብረ

1 ይሁዳን ዮ አመዕናኑተ ደግለሊሃ ጭም አኤመ ብርተኔሃ ክዕኔሃ ከተቡ ሀሰሰኖበአ።

2 መሰንትሰ አዕኑ ደግለልቶኖተ ቅጥ ይቴንታእረ እኬንተገ ደንጎምቤቹሃ «አካይ ባድ መኑ ህጎ ዘማኒቶ ኬሰ ደግለልቶተ ቅጥ ይቶእራን» ይ መቅዶን ባድ መኒሃ ክዕኔተኔሃ አመዕን ጠወዕዮሚሁ ጠረኝመክዕኔ ደጋምቤቹሃት፤ መነ ደግለልቶኖተ ዮህዕኔ ጡሙ ሰውቱ እሳቶ ልግብሰ ኬሰንሰዮኡ።

3 ጠው እኮጎሬ ከን ጠዊን ክዕኔተኔሃ ቦናም ቦኔኔ ህትን ተሰ አህበገ ከ አመኡሱተ ሶሃም፤ አዕኑ እን ከኒቶ ብርተ ዬምገን ተቃጠቤን አገሬ።

4 መቅደን ባድ መኑ እን ሜጡብ ክዕኔቤቹ አሜት ቅጥ ይቶኑዕነ ደጎህዕኔ ጎሬ ክዕኔን ድከኡኔ ሙልሰኖኔ፤ አዕኔሁ ሂላ ብከ ሙልቲነንተ።

5 ህካን እኮቤቺሃ አቶኖተ ላገተ አጌነተርቹ ሄጭቲን ቅጥ አቲነንተገ ቃግሶህዕኔተ ይ ከ አመኡሱት ሄጭት ክዕኔቤቹ መርታገ አኡ ሰውዬም፤ ህትን ግዳጂን እሁዕነ ኢታን አቲነንታሁ ቅጥ ዩኢሃ እሀኖ።

6 «ቀው ውጮ መንቹ ቀውንከ ምደኖ፤ ህትን ልግብ ውጮ መንቹ ልግብንከ ምደኖ» ህካን ሰውይዬ።

7 ሙንደኢን አሰኖሃ ጉዕመንከ መገኑ ኢተኖሃ እኮቤቺሃ ጉዕሙንኩ ቀልቤንከሰ ሰውዬገ አሱን ቤሉ ሻዘን ህከረንገ ግዲን አሱንከ።

8 ጉዕመ ወክት ጉዕመ ጠዋን ገውክዕኔ አታልቲን ጡመ ሆጉተ ጉዕመንከ አኢሃ መገኑ አበ በረከሰ አሶህዕኔተ አታለኖ።

9 ሁኩንን፡-
«ቡጥቻኖተ ህትን በትሽ አሴእ፤
ፈይመሰ ዘላለሚሃ ሄኣኦ»

የመሞ ከተበዋጋት።

10 ዜሬተ ዉጠኖሀኒሃ ዜሬተ ህትን እተኖሀኒሃ እቸተ አሰኖ መገኑ ዉጤነንተ ዜሬት በረከሰ አሰኖህዕኔ፤ ህትን ፈይመክዕኔ ላልቹ በትሰኖህዕኔ።

11 አዕኑ አቲነንተርቹ ኒ አዲን ቶገኖ መኑ ጉዕሙንኩ መገኑ ገለትጮተ ጉዕመ ወክት አቶኖተ ጉዕማንከ አዲን ቀባጣመተ እኬነንተ።

12 ኩ አዕኑ አቲነንታሁ አመዕናኖ ኦርሸተ ፉሹ ጠለዕለ እሁዕነ መኑ መገኑ አበ ገለትጨኖገ አአኖ።

13 ኩ አዕኑ አቲነንታሁ መሲህ ተሸት ላገተ አመዕንዮም ይቲን አዘዘሙክዕኔ እሳሃለከ ዋሎ መኒሃ አቲነንተረ እሁክዕኔ ለሊሰኖሃ እኮቤቺሃ መኑ መገኑ ገለትጭታኦ።

14 እሰን መገኑ ክዕኔሃ አሴህዕኔ አበ አሰቶተኔሃ መገኑ ኡጭታህዕኔ ወክት አልክዕኔ ለኦተ ሱንታህዕኔ።

15 መን ላጋን ጠወኦኖተ አታሌንበ ሸልማትሰተኔሃ መገኒሃ ገለቱ ኢሉሰ።

10

ጳውሎስ ክድመስተኔሃ አሴ መሰለ

1 እን ጳውሎስ ክዕኔ ብሬን ዮም ወክት ሙላሚሃ የመሞም፤ ጠዉ እኩጎሬ ክዕኔች ቁዕሬም ወክት መለላንቹ የመሞም፤ መሲህ ጎደበ ላፍማንለክ ጡምማን ኡጫንክዕኔ።

2 ኡጫንክዕኔንኩ እን ክዕኔቤቹ አሜቸም ወክት መለል ጠወአምገ አቶኖኤበአታት፤ ማል ሰውትገ እንክ ሄዕናምገ አቶእሩ መት መቶ መን ብሬን እኩጎሬ መለል ጠወኦተ ሀሳም።

3 መሰንትሰ ነኡ መሃ እኩጎሬ ከን ኣዱንያ አሌን ሄዕናም ጎሬ ከን ኣዱንያ አል መንገ ኦለማምበአ።

4 ኦለንሽኔ ኦዳት ሻንቀ ድጂሃ አታልሲሰኖ መገን ወልቀት ዮሰ ቤሉ ከን ኣዱንያ አል መሳርገ ዮእሃበአ። ክዝብ ኦደተ ድጅናም።

5 ህባን እኮቤቹሃ መን ሰውት መገን ኤንኬዕን አሌን ኬአኖ ቦን ኦደተ ጉዕመንከ ድጅናም፤ ህትን መን ሰውት ጉዕመንከ እንግ መሲህሃ አዘዘመኖገ አዕናም።

6 አዘዘሙክዕኔ ሹልቴንተ ወክት አዘዘንታበአ መን ገዱተ ፋልኖተ ተቃጠንቦም።

7 አዕኑ ለኤንንታሁ አብልን ለለኖ ጠወዱት፤ ሀኩ መንቹሁ «እን መሲህሃን» ይ አመዕኔኢች ለንኪሃ ሰዉ ዩን፤ ነኡ እሰገን መሲህረ እሁኔ ደጉን።

8 ቀርቹ ኣሴኔ ሹምነቴን አበ ድከዕዮም ጎሬ ሙላምበአ፤ ከ ሹምነቱ ቶንጎሚሁ ክዕኔተ ጠረኝንሶህዕኔታቤሉ ድጅኖህዕኔታበአ።

9 እን ክዕኔሃ ከተቦንክዕኔ ደብዳቤን ዋጅሲሳሚሃ አጉዱንከህዕኔ።

10 መሰንትሰ መት-መቱ መኑ «ጳውሎስ ከተቦ ሶህኑት አበ ኬዕምታእረ፤ እኩጎሬ እሰ ገውሰ ለኤኖረ አበ ላፈሃን፤ ጠወአኖ ጠውንኩ ህንቀሞእሃን» ይታኢት እቅ።

11 ሁኩ መኑንኩ ነኡ ቁዕራሻን ዮም ወክት ደብዳቤተ ከተቦሚሁለክ ግደኖን ክዕኔን ሜጡብ ሄዕዮም ወክት አዕናሚሁ ሜጡ እሁሰ ደጉን።

12 ነኡ እኩጎሬ መት መቶ ገውሰ ገለትጭታ መኒን ሜጡብ ገውኔ አመሰልኖተ ህከረንገ ገውኔ ለልንሶተ መለልናምበአ፤ እሰ እኩጎሬሁ ገዉሰ መት-መትንከሰ ለኣ ወክት ገውሰ ገገይንከሰ አመሰለንሶት ለኣ ወክት ኤንኬዕኑ ዮሰበእረን።

13 ጠዉ እኩጎሬ ነኡ ክዕኔተ ኢሎተ ኢሊ መገኑ ኣሴኔ ሆንኔ ወጢን ድከዕናም ቤሉ ድከኡ ሀሰሰኖኔህኒች አበ ድከዕናምበአ።

14 አዕኑ ዮንታሁ ክድመኔ ሆን ኣዜን እኮቤቹሃ መሲህ እንጂሊ ተማርሰኖተ አሜንቶም ወክት ኣሰሞኔ ሆንኔ ወጢች ህንጎምበአ።

15 ዋሉ መኑ ቆንዶዴ ሆኅን ጌሲች አበ ድከኢን የመሞኔ ሆኅኔ ወጢች ህንጋምበአ፤ አመዕነቱክዕኔ ነጸን መሮጌሳን ክዕኔቤችን መደበንቶኔ ሆጉኔ አልባዕልተን መርታገ ተብሳሃ አዕናም።

16 ቲሁ ከኒች ብርተ ዋሉ መኑ አታ ሆኅቤችን ኣንግ ቦኑዕነ ክዕኔች ካጽ አዲን ዮ ባዶኒሁ ተሸት ላገተ ተማርሰኖተ ተብሳሃ አዕናም።

17 ጠዉ እኮኅሬ «ድከአኖሁ ቀርቻን ድከኡን።»

18 መንቹ ገዉንኩሰ ገለትጨሞተ በቀአኖሲሁ ቀርቹ ገለትጨኖሰራት ቤሉ ገዉሰ ገይንከሰ ገለትጨንበአ።

11

ጳውሎሴለክ ክዝብ አሳበተኔሃ

1 አዕኑ ኢ ገውመኤ ቀውኅከ አታልቲንታኤ እቃን ጡመሃን እቅ፤ አዕኑ ሀንቅንከ እጀቅቲንታኤ።

2 አንን መገኑ ጡመርቹ ሰውየኖገ ጡመርቹ ሃሽዕዮንኬ፤ መሰንትሰ ክዕኔተ ጡመ ሀፍቶገ መቶ ኅኒሃ ሁኩንን መሲህሃ ሆንጠህሶህዕኔተ ጠዕምዮንክዕኔ።

3 ጠው እኮኅሬ ዋሪቹ ሀዋ ሾክማንተሰ ሉሊሾሴገን ህትን ክዕኔ ሰውቱ በዕያን መሲህ ዮህዕኔ ጡመ ሰውቲችለክ ነጢማች ፋልቲን መርቶኖታትንዶ ይ ዋጅዮም።

4 መሰንትሰ መቱ መንቹ ክዕኔቤቹ እሜች ነኡ ተማርሰኖንክዕኔ ኢሲች ዋሉ ኢሰ ተማርሴኅሬ ህከረንገ ቶጌንተ አያኒች አደ እኮ አያን ቶጌንተኅሬ ህከረንገ ቶጌንተ እንጂሊች አደ እኮ እንጂሊ ቶጌንተኅሬ ጠወሰ ጨለ ይቲን አእቲንተ ዩሃን።

5 ጠው እኮኅሬ አን ከን ሎርሎራኖ አሳባች መ ጠዋን ሆፈአሚሃ አጉጃኤበአ።

6 እኮኅሬ አን ጡመገ ጠወኣም መንቹ እህበኅሬ ኤንኬዕኑ ሆፈአኖኤበአ፤ ህከኒሃ ልግብ ወክት ልግቤ ዋቄን ለሊንሰ ኩልኖንክዕኔ።

7 አን መገን ተሸት ላገተ ደሞዙ ዮበኢሃ ክዕኔሃ ተማርሲሃለክ ህትን ክዕኔንተ ኅት እኢሃ ገውኤ ሙግ አዕዮሚሁ ጨብሃንዶ?

8 ክዕኔተ ካደሞተ ዋሎ አመዕናኖች ሀዕለንሽ ቶጎንከኤ እሰተ ዘረፎም።

9 ክዕኔን ሜጡበ ሄዕዮም ወክት ኦርሸት ኢሊቶኤ ወክት መቀዶኒች እሜቶ አመዕናኑት ሀሰሰኖኤርቹ ጉዕመ ጠዊን ሀዕልተን

ሄኑቤቹሃ አዬ አሌን እጅነተ እኮምበክ፤ ቲሱ ኢለ ክዕኔ አሌን መ
ጠዋን እጅነተ እኮምበክ፤ ከኒቶ ኤተሮኒ እጅነተ እሃምበክ።

10 መሲህ ሀንቁ ኣዘንከኤ ዮቤቹሃ ከን ጠዋን ቦኑ ከመኖኤሁ
አካይ ባዶን አዪሁ ዮበክ።

11 ህከን መሰት መርቹሃን? ኢታንክዕኔበኢቤቹሃትንዶ?
ኢታንክዕኔገ መገኑ ደገኖ።

12 ሁኩ ዋልት አሳበት «ነኡን እሰገ አዕናም» ይተን ቦንታ መሰተ
ከሞተ ቲሱ እኣሚሃ ከ ኤተሩሃ አኣም።

13 መሰንትሰ ህትኔ መኑ መሲህ አሳበተ አጉደተ ገዉስ ዶርታ
ክዝበኛኑት ሶቀማኑተለክ ሉሲሰ ሆጉተ አታእራን።

14 ሁኩን እጀብሲሰኖሃ ጠወበክ፤ መሰንትሰ ሸይጣኑ ገዉስ ኑር
መላይኬቹ አጉደተ ገዉስ ዶረኖ።

15 ህካን እኮቤቹሃ ሸይጣን ካዲመት ፍይማ ካዲመተ አጉደተ
ገዉስ ዶርቶጎሬ እጀብሲሰኖበክ፤ ኤተሮን ሆጎሰ ዋገ ደእታኦ።

ጳውሎሴሃ ክድመሰ መሳን ኢልቶስ ኦርሸተ

16 «አዪሁ አን ገወ እኮሚሃ አጉዲንከሰ» ይ ቲዉ ጠወኣም። ገወ
እጉጅንክዕኔጎሬሁ ቀቅቹ ቦኖተ ገወ መንቶገ አቲን ዋለዕዬኤ።

17 ህትን አመዕን ቦኒን ጠወኣሚሁ ቀርቶ ሰውትገ እሁዕን ገወ
መንቹ እክት።

18 ልግቡ መኑ ከን ኣዲንያ አል ጠዋን ቦንታቤቹሃ እኒሁ ቦናም።

19 መሰንትሰ አዕኑ ኤንኬዕናመተ እኬንተቤቹሃ ገዋኑተ
ሙንዲኖን አታዕልቲነንተሳት።

20 ህትን አዪሁ ሮሰገ ጠቄህዕኔጎሬ ህከረንገ ዘረፎህዕኔጎሬ
ህከረንገ ደግለሸቀሞህዕኔጎሬ ህከረንገ ህንቆህዕጎሬ ህከረንገ
መጫለክዕኔ ዋቀሮጎሬ አታዕልቲነንተ።

21 እኮጎሬ ነኡ ህከኒሃ አበ ላፋኑተ እሁኔ ሙለን ጠወኣም፤

ጠወ እኮጎሬ አዪሁ ቦኖተ መለሎጎሬ እኒሁ እሰገን መለል ቦናም፤
ካን ያሚሁ ገወ መንቶገ እክት።

22 እስ እብራዌየ መነንዶ? አንን እብራውቹሃን፤ ህትን እስ
እስራኤልየ መነንዶ? አን እስራኤላውቹሃን፤ እስ እብራሂምተ
ዘርንዶ? አን እብራሂምተ ዘር።

23 እስ መሲህተ ካዲመንዶ? አን እሳቶ ባሽ መሲህየ ካዲንቹ፤
ካን የን በርገጋሽጋት ጠወኣሚሁ፤ እሳቶ በትሽ ልግብ ወክት ሆጎን
ቆንዶድዮም፤ እሳቶ በትሽ ልግብ ወክት ኡሶራሞም፤ በትሽ ልግብ
ወክት ገረፈሞም፤ ልግብ ወክት ሬሆተ ኢልዮም፤

- 24 አይሁዱ ኦንቱ ወክት ሰጅኔ ሆንሶረ ጅራፊን ገረፎኤ።
- 25 ህትን ሰሱ ወክት በርቲን ዋቀራዋም፤ መቱ ወክት ክኒን ቀሰዋም፤ ሰሱ ወክት መርከቡኤ ባር አሌን ቢጠሞኡ፤ ህትን መት ሀንከዕርተለከ በሪሃ በሃር አሌን ዲንክዮም፤
- 26 እን ልግብ ወክት ዋቄ አሌን ሄኦን ድርሲን፤ ሸፍጢን፤ አይሁዱን፤ አይሁድ እህበ መኒን፤ ከተማንለከ ኡለ ኡድማን፤ በሃር አሌን ምዕረት እልቶኤ፤ ህትን ክዝብ አመዕናኖን ምዕርተዕዮም።
- 27 ህትን ልግቤ ሆጎን ሆጎም እቅ፤ ልግብ ወክት ግሰኛተ ሆጊንለከ ጎሪን፤ ሰገቤንለከ እቸተ ሆግ ኦርጨቀዋም፤ ህትን ቂዚንለከ ኦድኑተ ሆጊን ኦርጨቀዋም።
- 28 ህካን ጉዕመንከ ጠወ ዋለኡዕነ በሬን በሬን ጨነቀማሚሁ አመዕናኖ ጭሚቲሃት እቅ።
- 29 መቱ መንቹ ሆገኖ ወክት እን እሲን ሜጡብ ሆጋምሃበእንደ? መቱ መንቹ ጨብ አዕዮ ጎሬ እን ኡሙዕራምሃበእንደ?
- 30 ድከኤ ሀሰሾኤጎሬ እን ድከአሚሁ ላፈ እሁኤ ለሊሰኖ ጠውኒት።
- 31 ዘለለሚሃ ማሰአዋ ቀርቾሃ ኢስ እኑ መገኑ ክዝባምበእገ ደገኖ።
- 32 እን ደማሰቆ ከተማን ሄዕዮም ወክት ዋመ አርሰጠሴቻ ዋሮን ሄዕዮ ገሻንቹ አፎኤተ ሀሽ ደማሰቆ ከተም ኡራከተ አገርሲሾ እቅ።
- 33 ጠዉ እኮጎሬ ኤሳሃ ቀርጫታን ዋሬን ከተምሰ ኦታን ሄዕዮ መሰኮቲን ድሪሴናን ህከን መንቹ አንጋቻ ፋሽኤም።

12

ጳውሎሴሃ ለልቶስ ሃሽኦቲተ

- 1 ቦኑ ደግለለኖሃ እህበጎሬ ቦኑ ሀሰሾ ጎሬ ቀርቾሃ ኢሲቻ አሰሞኤ መናማንለከ መገኑ ለልሾኤ ጠዋን ቦናም።
- 2 መሲህሃ እኮ መቱ መንቹ ደጋም፤ ኩ መንቹ ቶነ ሾሎ ዘመኒቻ ብርተ ሰቅ ሰማሃ ኢለ መሰሞ፤ መሰሞንኩ ማልንከሰ እሁን እሁ ሆጉን ደጋንበእ፤ መገኑ ደገኖ።
- 3 ጠው እኮጎሬ መንቹ መገን ጄነት መሩሰ ደጋም፤ ጠው እኮጎሬ ማልንከሰ እሁን እሁ ሆጉን ደጋምበእ፤ መገኑ ደገኖ፤
- 4 እሰን ህከኔ ኩሎኖተ አታሌንበለከ መኑ ጠወኑተ አታልቡርቹ ሞጮጮአ።

5 አኒሁ ህትኔ መኒን ድከኣም፤ ገዪኤተኔሃ እኮጎሬ ሆንጌእ ቤሉ ድከኣም ጠው ዮኤበኦ።

6 ህከኒሃ እን ሀንቅ ጠወኣምቤቺሃ ድከዕዮሚች ገወ እሃምበኦ፤ ጠው እኮጎሬ አዪሁ ኢ አሌን ለአኖርቺሃ ኢች ሞጮጨኖሀኒች ኤሰሃ ሎረ እት ለኣበኣገ ይ ድከኢች አገዕራም።

7 ከ ኑር እክ ለሌኤ አበ ጠዊች ኬዕዮሀንን ቦናምበኣገ ማለኤ ኡትገ ቀሳኤ ኦርሸት ኣሰንቶኤ፤ ህት ኦርሸት ሶቀማንቺ ሸይጣንገ እሀን ኦርጨመን ቦናምበኣገ አአኖኤ።

8 ሁኩ ኦርሰኖኤርቺ ኢ አሊች ሽቆተ ቀርቺኤ ሰሱ ወክት ኡጨም።

9 ጠው እኮጎሬ እሰ «ኢ ወልቀት ሎረ እክ ለልታኢሁ ኪ ሆንጌን እኮቤቺሃ ኣሰቱኤ እካሄ» ዬኤ፤ ህካን እኮቤቺሃ መሲህ ወልቀት ኢ አሌን እኮተ መ ወክቲቺ በትሽ ሆንጌንተኤ ተሽ የዕኔ ድከኦሰተ ኢታም።

10 ወልቀተ ደኣሚሁ ሆጎም ወክት እኮቤቺሃ መሲህተኔሃ ቦርረመኤ፥ ኦርጨቀሙኤለከ ሆቸሙኤ ተሽ የኖኤ።

አሳቤቹ ጳውሎስ ቆርንቶስ መኒሃ ሰው ዩሰ

11 እን ገወ መንችገ ጠወዕዮም፤ እኮጎሬ ገወ እሃምገ አቴንተኤሁ አዕኖንት፤ አዕኑ አተኔሃ ጡመ ጠወ ጠወኤ ገበአኖህዕኔሁ አዕኖት እቅ፤ መሰንትሰ እን መ ቀዉ መንቺሃ እኮም እቃ ህከን ሎርሎራኖ አሳባች መቶርቸን ሆፈኣምበኦ።

12 እን ሀንቅ አሳቤቹ እሁኤ ለሊሰኖ ጠዉ እን በላንከክዕኔ ሄእን አደቢን አዕዮምተ ሆጉ፤ ህት መላንት አጅበተለከ ገረምሲሳእታን።

13 እን ክዕኔተ ብረ ጠዕሙ ሆግንከኤ አሌንከክዕኔ እጅነተ እሁዕነ ፈቆም ቤሉ ዎሎ አመዕናኖ ዱእ ምኒች ሆፍቸንክዕኔሁ ማኒት? ሁኩን ቤሱ እኮጎር ማሬእ።

14 እን ክዕኔበ አሜቲሀእ ሰቅያ ወክት፤ እን ክዕኔተ ገዉክዕኔት ቤሉ ክዕኔርቺ ሀሳምበኣቤቺሃ ክዕኔ አሌን እጅነተ እሆተ ሀሳምበኦ፤ ቲሁ አኖኑት ኦሶተሰ ብረ ጭምአት አፋሹ ሀሰሰኖሰ ቤሉ ኦሶት አኖተ ብረ ጭም አታበኦ።

15 እን ክዕኔተኔሃ ብሩኤ ፈቅያን ፎልኤ ህግሽ ኣሰዮም እቃ አበ ሙንደኣም፤ ህከረ እን ኬንከ በትሽ ኢታንክዕኔሃ እኮች አዕኑ ኤሳሃ ኢቲ ሀሰሰኖሀዕኔሁ ቀዉሃትንደ?

16 እሀን ቤሉ እን ክዕኔ አሌን እጅነተ እኮምበኦ፤ ጠዉ እኮጎሬ አዕኑ ይቴንተገን ጣንሰ ተንኮን አፎንክዕኔሃ አጉደኖ።

17 ክዕኔቤቺ ሶኮም መኒች መትሰ አዲኒ እኮዕቃ ክዕኔች ጣንሰ ኣእዮክዕኔዶ?

18 ቲቱ ክዕኔ አደ መርተ ኡጭዮንስ፤ ኒ አመ ቤቱንከ እሲን ሜጡብ ሶኮም፤ ቲቱ ጣንሰ አእዮህእኔዶ? አንለከ እሰ አዕኖሚሁ መቶ ቀልብንበእንደ? ህትን ለምኔ ቀልቡንኩ መቼሃበእንደ?

19 አዕኑ ቲሱ ኢላ ነኡ ክዕኔ መዴን ገዉኔ ከዕመቀማሚሃ አቲን ሰውይቱነንታት? ነኡ መሲህን እንክ ጠወዕኖሚሁ መገን ብሬኒት፤ ኒ ጃላ! ጠወዕኖሚሃ ጉዕመንከ ጠወዕኖሚሁ ክዕኔተ ጠረኝንሳም ይኒት።

20 እን ክዕኔቤቹ አሜታም ወክት አይደገ እኮኖተ ህሳምገ እኮኑዕናን አኒሁ አዕኑ እሆተ ሀሴነንተገ እሁዕናን ደቀሞምኅር ይ ዋጃም፤ ህትን ክዕኔ በላን ብተት፤ አቄሸት፤ አሙዕርት፤ ገጉ ኢቱ፤ መን ሱዕመ ቤሱ፤ ሄምት፤ ቦኑ፤ ጨንጨነት ሄኣ ይ ዋጃም።

21 ህትን እን ለንኪሃ ክዕኔበ አሜቾም ወክት ኢ መገኑ ክዕኔ መዴን ሙልሰኖኤ ጎሬ ይ ዋጃም፤ ህትን ከኒቾ ብርተ ጨብ አት ህከን አቶ ሂላ ንጃሲን፤ ዘነተ አእተኔሃ፤ ህትን አለ ቅልቢን ቶቡቱ ሆኅ መን ሻዞ አሌን ኡባም ይ አበ ዋጃም።

13

ጎፍሜ ሸዘነተለክ ወገሬትሱ

1 አን ክዕኔበ አሜቶተ ኩን ሰቅያ ወክት፤ ጠዉ ጉዕሙንኩ ኡረኖሁ ለም ህከረንገ ሰሶ ምሰክር ላጋኒት።

2 ለንክ ወክት ክዕኔቤቹ ለእህዕኔተ መርም ወክት ጠረኝሽ ጠወዕዮም እቅ፤ ቲሁ ህትን ቁዕራሻን እክ ከኒቾ ብርተ ጨብ አቶህኡተለክ ወሊሃሰ ጠረኝሽ ጠወኣም፤ ቲሱ ክዕኔቤቹ ፈንቀል አሜታም ወክት ሜጢሃ አሙዛምበእ፤

3 አዕኑ ኢን ሄዕይ ጠወአኖሁ መሲህ እሁሰ አጥራመቶኖተ ሀሴነንታት፤ ክዕኔቤቾን ለለኖንኩ እሰተ ወልቀ ቤሉ ሆንጌተሰበእ።

4 መሰንትሰ እሰ ሰቀለም ሬዮሁ ሆንጌን እኮጎሬሁ ቲሱ መገን ወልቃን ፎሊን ሄአኖ፤ ህትን ነኡ እሲን ሜጡብ ላፋኑተ እንኮም፤ እኮጎሬ ነኡ ክዕኔሃ ዮኔ ደቀሺን እኮጎሬ እሲን መገን ወልቃን ሜጡብ ሄዕኖም።

5 አመዕነትንከክዕኔ ሄኡክዕኔ ደገሃ ገዉክዕኔ አጥራመቱን ለዕዬ፤ ህትን ገዉክዕኔ ፌተኝ፤ መሲህ ኢሰ እዜንከክዕኔ ሄኡሰ አጥራመቱንታበእንደ? ህካን እህባቾ ሀንቅንከ ፌተናን ኡቤነታ ዩሃን።

6 ነኡ ፌተናን ኡቡ ሆጉኔ ደገነንተገ ተብሳሃ አዕኖም።

⁷ አዕኑ ሂለርቹ አቲነነተበእገ መገን ቤቹ ዱአ አዕናም፤ እሰን ነኡ መቱርቹሃ ፊተናተ በቀንዕበረ እንኮም ጎሬ አዕኑ ጉዕመንከ ወክት ጡመ ጠወ አቶኖታት ቤሉ ነኡ ፊተናነተሰ ህንጋም ጠረኛኑተ እሁኔ ለሊንሶታበአ።

⁸ መሰንትሰ ነኡ ሀንቅ ቤሉ ሀንቅ አሌን መቱርቹሃ አዕኖተ አታልናምበአ።

⁹ ነኡ ላፋኑተ እንካን አዕኑ ጠረኛኑተ እኬንተ ወክት አበ መንደዕናም፤ ኒ ዱኡ አዕኑ አመዕነቲንከክዕኔ ጠረኛኑተ እኮኖታት።

¹⁰ እን ከ ሶህኑተ ክዕኔቶ ቄዕር ዮም ወክት ከተሶንክዕኔሁ ክዕኔቤቹ አሜቾም ወክት ቀርቹንኩ አሴኤ ሹሚነቲን ጨነቃንክዕኔበእጋት፤ መሰንትሰ ቀርቹ አሴኤ ሹምነት ወልቀት ክዕኔተ ጠረኝሲሃት ቤሉ ሆግሲሃበአ።

¹¹ በትሸን አመኤ ኦሶ! ወገሬቲን ሄዕዬ፤ አመዕነቲንከክዕኔ ሆፈአኖህዕኔርቹ ዮህዕኔበእረ እኬ፤ ሸዘነእ አጥራመቹ፤ ገገይንከክዕኔ ኢተቀሜ፤ ወገሬቲን ሄዕዬ፤ ኢተለከ ወገሬት መገኑ ክዕኔን ሜጡበ እህኖ።

¹² አመዕናተ ሀሰሰኖ ሱንቃቀንሺን ሱንቃቀሜ።

¹³ አመዕናኑት ጉዕሙንኩ «ወገሬት ዮንተንዶ?» ይቶህዕኔ።

¹⁴ ቀርቾ መሲህ ኢሰ አሰቱቲ፥ መገን ኢተቲ፥ ጠሊለ አያን ሜጡ እሁ ጉዕሚንከክዕኔ እሁን።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d